

長文襄公自定年譜

十六年辛未五十四歲



六月初三日接奉

上諭河南巡撫員缺著長齡補授欽此

初六日自烏里雅蘇臺起程進京

陛見疊蒙

召對

七月二十二日延津途次接受河南撫篆兼提
督事務

二十七日具

奏據報江南李家樓漫口淹及豫境永城夏邑虞城均被水淹奉

硃批查明速奏欽此又

奏內黃縣係積歉之區請將小渡等五村莊應徵新舊錢漕衡工加價灘地租銀出借銀穀等項緩徵

九月初二日具

奏查明江南漫水下注入豫東南一股由永城縣之邵伯集入境至永宿集出境正南一股由夏

邑縣之積善村入境從顧家隄口出境匯注永
城縣邵伯集西南一股由虞城縣之小喬集入
境從祝家隄口出境匯注永城縣之巴溝河計
永城夏邑虞城等縣平地水深三四五尺及七
八尺不等永城境內於八月十九二十二十一
等日水又增長尺餘城北護隄水浪沖激勢甚
危險夏邑因黃流匯入境內自十九日以後水
勢日增隄外四面汪洋勢甚洶湧臣於拜摺後
卽親赴永城等縣督飭疏通以期不至泛溢至

災分村莊應請先行撫恤一月口糧極次貧民
戶口照例加賑坍塌房屋給與修費應徵錢糧
分別蠲緩

十一日具

奏查虞城縣地居上游續淹潘家莊等共二十五
村莊夏邑縣西南境內有響河小隄一道東南
隄身均已淹沒僅存西南隄身十餘里集鎮村
莊藉此未被水漫隄內東北村集一片汪洋
臣
駕小舟前至城隄緣夏邑城垣向賴護城隄捻

作爲保障現在黃水四面環繞地勢本窪形如釜底隄內已有水滲入無處取土當飭於城內街巷起土漏夜將隄埝加築高厚並將響河小隄亦加培築臣由會亭驛至永城縣黃水已至護城隄根深有丈餘東北一帶水勢一望無際村莊直迎大溜民田廬舍多被沖塌縣城及西南一帶村莊均賴汴隄阻隔已飭縣趕築加高該三縣被水情形虞城十分之二東西寬三十餘里南北長三十餘里共淹一百一十九莊夏

邑十分之六東西寬六十餘里南北長六十餘里共淹八百四十三莊永城十分之七東西寬八十餘里南北長九十餘里共淹一千八百九十五莊成災分數輕重不一永城爲豫省極東之地上游碭山虞夏各縣之水均匯歸永城夏邑在永城之西北雖村落被淹較少而縣治爲水所圍虞城又在夏邑之西較永夏二縣情甚輕淺臣已飭趁此水落之時趕將護城圍隄大加培築其汴隄一道西南一帶賴其保護亦須

逐段修補惟查自李家樓漫口以來已及兩月
現未興工合龍有需時日不但明年春秋收成
無望甚至終歲流離人情頗露窮促計明年春
汛尚有五月之久若十月內動工堵築春汛前
可期合龍卽一時不能辦竣百姓皆有期望亦
不致有所藉口奉

上諭昨據長齡奏河南永城夏邑虞城三縣被水情形
當卽降旨令百齡等速籌挑挖李家樓以下河身淤
墊以期及早堵合漫工朕復詳加體訪河南三縣係

漫水經過被淹已如此深廣所傷人口不少其江南
碭山地處頂衝安徽宿州以下爲全流滙歸被災情
形自必更重朕軫念災區宵旰焦勞未嘗暫釋爲今
之計惟有將李家樓以下淤墊處所與王營減壩以
下各工同時並舉庶減壩合龍後李家樓漫口亦卽
接手堵築早一日合龍則災民早一日安堵朕亦可
早贖一日之咎總須於明年桃汛以前將全河挽歸
舊路方可使十數縣災區稍甦重困所有王營減壩
以下挑工堵築事宜及李家樓以下挑工該督等卽

決意速籌分投價辦不可再存觀望之見事關重大
務須妥速經理欽此

同日奉

上諭本年江境兩開漫口現有王營減壩李家樓鉅工
未堵其被災地方亦廣朕宵旰焦勞時時軫念普天
之下未有重於此者百齡等所奏欲堵減壩必須大
挑雲梯關內外河身欲堵李家樓必須大挑邳北上
下河身減壩不能遽堵李家樓口門亦不能卽堵此
乃事理之自然惟有設法趕緊辦理成功愈速則人

事盡而災患可弭若俟減壩工竣再籌辦理李家樓
浚河築口之事則實不能待惟有將王營減壩以下
挑工與李家樓以下挑工同時並舉可以將時日償
前於全局補救甚大若仍執借黃助清之說遷延觀
望則太不權利害輕重大小甚屬非宜非大清之臣
僕矣從古治河重在宣防皆以河決爲患未聞有言
河決轉受其益者刻下安豫十餘縣災地盡在洪濤
巨浸之中民情急迫其可虞之處昨降諭旨已言之
甚明若李家樓漫口不及早堵合明年伏秋大汎安

豫被災之區益形泛濫所不待言而以全黃之勢直注洪湖設圩堰不能保守其患尙可言乎百齡等豈可輕聽曲說而不遠慮及此指日汎水方來漫口未築何忍將此數十萬良民盡付洪水不思援救朕承

天

考付託豈肯爲此暴虐之事朕銳意速辦以贖已咎著百齡等卽遵昨降諭旨剋日興挑李家樓以下河身淤墊切近被災各縣一聞興舉大工數十萬之夫可一呼而至並可曉諭該處紳士使知國家不惜重帑

同時僭辦鉅工用以救災卹患恩意傳播民情自必
大安愈速愈妙但不可稍有草率冀於明年桃汛前
使河歸故道以拯災黎以釋朕憂百齡等卽勉力籌
辦若再飾詞推諉必將倡議之人正法示衆凜之欽
此

十六日具

奏被水被雹之原武陽武正陽羅山信陽光州光
山固始息縣等九州縣並臨漳縣屬之柏鶴集
一百餘村莊應徵新舊錢漕衡工加價及借領

銀穀等項一體緩徵

二十日中牟工次會

奏中牟下汛大隄北唇上有子埝寬六丈高隄頂
八尺順隄舊有埽工五十九段內四十二埽至
五十五埽自霜降後水落歸圈以致存灘塌盡
各埽底料朽腐隨卽蟄陷潰及隄身順長六十
餘丈寬四丈餘尺河水忽湧湍激異常甚爲危
險臣於勘查永城等三縣被水災區後回抵陳
留馳與臣李亨特先後到工查該工地處上游

逼近汴梁省會設有疎失關係匪輕臣等到工
之日大隄猶在潰塌察看水頭高逾隄面二尺
幸而汛前加幫子埝一丈得以攔禦否則大溜
卽可漫過隄頂實爲可畏之至惟河形已成南
北頂衝溜勢射注不移極爲洶湧子埝塌存僅
寬四五尺臣等察看形勢分投用船跨樓先擇
著緊之處趕下埽段用資攔護並一面放價跑
買筐土將子埝南邊加幫一律高寬再於大隄
之南添築半截以期寬厚堅固竭七晝夜之力

將三堡大隄子埝三百一十丈普律搶築完善
所蝨各埽俱已補還高出水面七八尺不等並
俱追壓到底查該工猝然生險潰隄走埽十分
危急隄外居民於隄上搭棚棲止以防不虞臣
等目擊情形心膽戰慄莫可名言竟得搶護平
安實爲萬幸事竣迴思猶深凜惕臣卽自工回
省料理地方事宜奉

上諭長齡著交部議敘欽此

十月十一日具

奏虞城夏邑永城三縣民人猝被水淹不免蕩析
月餘以來漸次遷移高阜依託親故稍就安貼
此次辦理災賑必須實心實力周被無遺一俟
戶口查清卽在藩庫存貯別款銀兩內先行動
支俾窮黎早沾實惠奉

硃批實心辦理以山陽之案爲戒勉之慎之欽此
同日具

奏奉

上諭百齡等奏籌堵李家樓口門該省料物不敷須河

南協濟稽料二百堆蔴蒜五百萬觔以充公用等語
李家樓漫口現限明年正月內合龍著傳諭長齡竭
力採購照數運工交收切勿稍有遲滯等因欽此遵
卽嚴飭素產蔴料之祥符等州縣按照市價上
緊購買一面分別水陸限於十一月三十日以
前全數購齊運到倘有遲誤及將泥蔴朽料充
數並藉端派累閭閻各弊定卽嚴行叅辦奉
硃批竭力辦理速運抵工欽此

二十六日

奏謝領到

御製喜雨賦墨刻一分

十一月十六日

奏報校閱省城滿漢營伍

十九日具

奏查永城夏邑虞城三縣被水情形較重來春青
黃不接之時失業貧民不免拮据應請概照原
放戶口於明春再展賑一月至李家樓漫口合
龍後涸復地畝並請酌借籽種牛具銀兩賑務

關重現當各處散放喫緊之時臣於拜摺後卽
赴永城等處抽查村莊戶口散放銀米數目察
看地方情形並順道勘辦一切工程奉

硃批實心經理務令均沾實惠查出弊混立卽嚴叅不
可迴護欽此

十二月十八日具

奏各州縣因彌補過急挪新掩舊先經展限十七
年全完今定限僅餘一年尙未補銀三十二萬
餘兩之多在各州縣頻年辦公竭蹶尙屬實在

情形似不能於明年一歲內全行補足現在擬
定冊式飭發該管道府嚴督各州縣將倉庫正
雜存貯解支各款截至本年年底爲止逐一查
造核明確數庫銀於春徵以前奏銷以後兩次
全數提解倉糧盤查由該管道府親驗封貯以
絕續虧挪掩之弊庶可截流清源奉

硃批據實具奏欽此

二十八日

奏謝領到

御書福字等物

是年子桂輪補授治儀正

十七年壬申五十五歲

正月二十一日具

奏竊准兩江總督臣百齡咨會江南李家樓要工
趕緊次第進占並改挑引河需費浩繁已奏請
於河南藩庫先行借撥銀三十萬兩起解赴工
等因前來查江省李家樓要工並開挖引河工
需銀兩極爲緊急誠恐停工待項所關非淺

臣

不敢以未奉

諭旨稍事拘泥致滋貽誤當卽飛札藩司蔣繼勲在於豫省庫貯項內動撥銀三十萬兩委員卽日分解奉

硃批已有旨還款矣欽此

二月初二日具

奏孟縣城隍關係保衛旣經勘明隄身被水汕刷殘缺之處甚多亟應培築高厚務于大汛以前辦竣方爲妥善需工土銀一萬九千二百九十

七兩二錢零援照前次舊案在藩庫如數借給
趕緊興修

初八日

奏報起程查閱南路營伍

三月二十九日

奏謝領到

御製嗣統述

聖詩全冊

四月十七日

奏謝領到

御賜錠藥又

奏查李家樓蔴料上年派開歸道陳啟文河北道
張志鑑歸河通判徐章赴工因河道凍阻車運
較遲誠恐貽誤要工晝夜往返督催並查有觔
重未足及攪雜泥土之處著令補換就近挑打
一律純淨在工四月頗能不辭勞怨力顧要需
奉

上諭前據百齡等保奏陳啟文等催辦料物出力請分

別議敘陞用當經降旨以該員等分隸豫東兩省非百齡等所屬飭交長齡查明具奏陳啟文張志鑑俱著交部議敘徐章著加恩遇有應陞之缺陞用欽此
五月十四日具

奏孟縣大河首受陝甘來源出山之木最爲猛驟該縣南城外舊有護城隄一道迤上尙有小金隄一道原係民間修築乾隆元年動

帑興修十九年因河勢南移當經停修此數十年來歷被漫水汕刷小金隄並無遺址之由來也

近年河勢北徙去歲異漲非常將該河分爲三股南股約寬四百餘丈中股寬二百餘丈北股寬一百八十餘丈水深七八九尺不等中股之水向北刷出溝漕一道併入北股溜勢更爲洶湧出漕之後將護城隄刷塌現已興築一律完竣自應照從前制度將小金隄趕緊修復以資蓋護查該處隄身長一千二百丈擬估頂寬八丈底寬十一丈高六丈斜堵北股來源挑溜南趨並於河身內用料鑲築北面澆築土戢隄頭

裏鑲埽段以免汕刷方臻穩固奉

上諭著照所請迅速興築以禦汎漲欽此

六月十三日

奏謝領到

御製河復紀事墨刻一分

八月初七日

奏謝領到

御製全史詩四冊

九月初三日具

奏請將湯陰臨漳合邑暨安陽內黃林縣武安汲
縣新鄉輝縣淇縣濬縣被水被旱各村莊應納
本年錢漕及帶徵歷年舊欠錢漕加價借領銀
穀等項緩徵並將明年應完新賦遞緩其孟津
縣前次被塌地畝未復應納本年及帶徵各年
錢漕加價等項照例停徵安陽內黃二縣應完
十四十五十六等年舊欠於本年秋後啟徵十
一十二十三等年舊欠於十八年秋後啟徵其
自六年至十年舊欠於十九年秋後啟徵

同日具

奏起程查閱北路營伍又會

奏竊照豫省河工歲料向係沿河州縣領銀派買
乾隆三十年以民間苦累

奏准官爲代辦又因例價不敷加幫價一項乾隆
五十七年因攤徵幫價未能年清年款經戶部
議奏刪除嘉慶四年於通省道府廳州縣養廉
內攤捐津貼嘉慶十一年歸廳領辦臣等愚見
州縣欲其廉隅自矢禁絕虧挪河廳欲其實力

急公不致浮冒均須免其扣廉俾公用有資始足杜藉口而收實效查東省沿河州縣向亦攤扣廉銀爲歲料幫價嘉慶十年以存庫城工盈餘銀交商生息以作幫價等項之用毋庸扣廉今豫省歲料事同一律請照東省章程將衡家樓大工案內應撥粵海銀一百萬兩作爲豫省歲料幫價生息成本以七十萬兩交兩淮鹽政三十萬兩交長蘆鹽政各令交商按月一分生息每年計得息銀十二萬兩遇閏加增息銀一

萬兩以備歲料幫價之用免其攤扣養廉

二十三日具

奏校閱河北鎮標營伍

十月十六日具

奏審明僧人如意誤執傷痕誣告致伊師真玉屍
遭蒸驗一案定擬完結

十一月二十六日具

奏湯陰等九縣被旱被水村莊請俟來春分別借
糶倉穀

十二月初八日具

奏審明叅員周存義挪移庫項至二萬兩以上論
如律

同日具

奏查豫境省城西南之密縣滎陽等處崇山疊嶺
深溝巨壑每遇山水漲發勢若建瓴自鄭州而
東則一望平行淫潦易積元臣賈魯因汴河之
舊大加開通後人因名爲賈魯河上自滎陽境
內之須水索水及鄭州境內之京水合流處起

歷中牟祥符尉氏扶溝西華商水等縣達安徽之正陽關入淮水漲則疏消有路雨少則灌漑可資又係蘆商行銷豫引運鹽要道一切米糧貨載行旅船隻亦由安徽臨淮關直抵鄭州不獨黃河以南等府資其利濟卽河北諸郡亦藉商船通運渡黃販載裕課便民洵屬豫境商民所攸賴雍正十三年乾隆二十二年五十年均因河流淺墊動

帑興修擇要疏濬並未一律大挑現惟扶溝境內

之下游有雙濟河一道合流爲助故迤下之西
華商水等縣尙屬深通自雙濟河迤上直至鄭
州境內計長二百八十餘里均因浮沙日積節
節淤墊溯查賈魯河深通之際尙恐異漲難消
特於上南河廳之核桃園地方建設閘座俾其
分瀉入黃嗣因黃河墊高閘口淤閉復開設廣
惠惠濟等河以防賈魯河宣洩之所不及茲查
廣惠惠濟等河均已淤成平陸而賈魯河正身
又復淤墊日甚無槽道可歸無尾閘可洩且於

伏秋汎內浸及上南河廳之核桃園石家橋一帶隄根每遇搶險之際簣土難求至下游各縣又因淺不通舟商販均須陸路起運以致百物增昂貧民失業蘆商運費不資亦加疲累節據紳耆士庶及長蘆商人紛紛籲懇興挑臣於閏兵之便親自履勘委係通省水利所關急需辦理之工計自鄭州境內之徐莊起至扶溝境內之雙濟河止應挑河身長五萬一千五百一十一丈挑深三四尺至六七尺不等展寬五六尺

至三丈餘尺不等共計挑土一百二十九萬二百餘方又該河係有源之水必須另籌去路方可煞壩與挑查廣惠惠濟等河尙存河形應將淤阻處所間段抽溝俾築壩放水之時得以循軌下注計抽溝工長一萬四千三十丈挑土八萬五千二百餘方二共土一百三十八萬二千四百餘方至挑河方價旱土例價止八分一釐水土例價止九分九釐現在人夫食物昂貴且挑深至六七尺不等積水地泉隨時車戽方可

興工又間段多有砂礪沮淤挑挖不易例價實有不敷現估計旱土每方除例價外實需津貼銀一錢三分一釐水土每方除例價外實需津貼銀一錢四分七釐請將例價銀十三萬六千八百餘兩按糧攤徵津貼銀十九萬四千九百餘兩在於通省州縣以上養廉及長蘆商人各半分捐先於司庫借撥興工均限三年分別攤徵扣借還款於正月內春水未生之時分段承挑尅期三月內農忙以前趕辦完竣奉

上諭戶工二部議覆長齡奏請借項興挑賈魯河一摺
著照長齡所請按估興挑欽此

同日

奏謝領到

御書福字並鹿肉野雞等物

十八年癸酉五十六歲

三月初八日具

奏審明姜彭氏以姜鐸次嫌誣告聞添錫窩竊復
向嚇詐致其母聞徐氏忿激自盡捏稱爲差役

逼斃圖脫子罪轉指張步武等勾串主唆致斃
二命一案定擬完結

四月初九日具

奏豫省缺雨請將祥符等二十七廳州縣新舊錢
糧加價等項緩徵

十三日

奏謝領到

御賜藥錠一匣

二十二日具

奏查明祥符等二十州縣秋禾未能播種請借給
貧民一月口糧又襄城縣缺雨請將新舊錢糧
加價緩徵

同日具

奏審明夏邑縣知縣胡壽芝僭用越級帽頂並戴
藍翎且於審理賭案率意濫責刑求應請發往
新疆

五月初七日

奏謝領到

御製詩二集全冊

二十日具

奏查明缺雨之祥符二十州縣未種秋禾無業
貧民請給一月口糧

同日具

奏齋肅馳赴

嵩山頂禮虔求雨澤親行取水設壇祈禱旋於二
十一二十二二十三等日各處得雨二三寸及
四五寸不等

六月初一日具

奏駐防滿營官兵請借支本色口糧奉

硃批依議辦理欽此

初五日具

奏派員領運截留漕糧接濟河北三府及開封所

屬各州縣酌量輕重情形均勻撥給奉

上諭務使小民普沾實惠勿令經手胥吏從中侵蝕欽
此

七月十一日

奏請祥符等十六廳州縣城鄉分厰煮粥散給災民

二十三日具

奏審明西華縣知縣徐漢短交庫項一案定擬完

結

二十五日接奉

上諭烏魯木齊都統員缺著長齡補授欽此并奉

諭旨長齡接奉此旨不必來京請訓卽將撫篆交藩司
蔣繼勲護理由豫省馳驛速赴新任所有恒傑呈遞

各件俱發交松筠帶往長齡於途次詳悉閱看與松筠偕往烏魯木齊會同秉公逐款詳查審辦毋得稍有瞻徇欽此

十月十三日抵烏魯木齊都統任會同松公筠審辦恒傑訐控前任都統興奎一案定擬完結

二十一日接奉

諭旨陝甘總督員缺著長齡補授卽赴新任等因欽此
十一月二十四日平番縣途次接印任事

十二月初二日

奏報派委各鎮巡哨邊界安靜

同日具

奏到任未及三月請將年終密考緩期

初三日由五百里具

奏盤獲邪匪僧人吉仰花衣包內搜出天平大王
木戳一個內有離卦字樣並據供稱左奉先是
明戶大師焦進賢是鎮殿將軍等語一面飛札
陝西撫臣嚴拏究辦一面分派委員查拏

初七日具

奏據報陝西鳳翔府岐山縣三才峽地方匪徒聚
衆當卽飛飭南山各營將備各帶官兵由所屬
交界相機前進四面圍截並於甘省各隘口添
派文武妥員嚴密截拏如須震以兵威臣卽親
往督辦

十九日由六百里具

奏拏獲巽卦習教邪匪劉建臺供稱曾拜劉運祥
爲師口授咒語並治病藥方又從河南張姓授
以三十六字符紙分給巽字卦名

同日

奏報於十九日帶兵前赴陝西岐山縣剿辦賊匪

二十六日承准

廷寄欽奉

諭旨飭令迅速挑帶甘省勁兵一千名不分晝夜兼程行走
到彼督率上緊剿辦若辦理妥速仍當加以恩獎等因欽此

二十八日馳抵陝西盩厔縣

是年子桂輪射中布靶五矢挑

乾清門侍衛

十九年甲戌五十七歲

正月初三日具

奏連次勦辦萬五股匪於平木地方擒獲活賊九十餘名於觀音硎擒活賊四十餘名於馬里地方獲賊五十餘名奉

硃批此事以迅速痛勦爲主我兵不宜多分隊伍先儘大股賊匪盡行辦淨則小股震懾聲威散者必衆總以殲戮首逆萬五爲要用兵之道合則氣壯分則見

單不可墮賊詭計汝等同心協力殺賊安良佇膺懋賞勉之欽此

初三日接奉

諭旨令高杞馳赴蘭州暫署陝甘總督印務長齡俟勦辦諸務完竣著卽由陝起程來京陛見等因欽此

初五日交卸印務

初九日

奏請捐銀二萬兩以備河南陝西賑務之用

同日具

奏於沙壩地方兩面夾擊斃賊二百餘名擒獲偽
軍師周在庭等二百二十餘名又於子午峪打
散萬五股內零匪一百餘人棗木欄一帶勦殺
二十餘名生擒十五名又有尤九陳四等股匪
自行投出一百二十三名

十五日具

奏萬五股匪由老林逸入寬溝兩面伏兵盡起該
匪紛紛爬上山梁當經殲斃一百餘名萬五帶
領狡悍賊匪三十餘人衝出寬溝經達凌阿等

堵住槍箭齊發萬五左腿帶傷二處不能行走
當將該犯生擒並獲旗手尙得勝等二十餘人
餘盡勦除其吳抓抓股匪竄至黑河鐵爐川經
副將何占鰲等殺斃先鋒雷光廷等五十餘名
擒賊四十二名吳抓抓已往隴縣現在派兵分
勦

二十二日具

奏於桃花坪勦辦麻大旗劉二股匪首夥全行殲

滅寶隴一帶肅清

二十六日具

奏於吳家堡痛勦陳四股匪生擒首逆尹朝貴等
四百五十餘名於黃草坪生擒姜士偉等六十
餘名於三元壩殲斃龔貴股匪五百六十餘名
三次連得勝仗

同日覆

奏欽奉

諭旨長齡失察豫省教匪積愆甚重現在大兵雲集限
於奉旨後一月內全行辦竣若辦理遲延二罪並罰

卽行拏問從重治罪等因欽此伏查此次辦理情形

卽係遵

旨每兵一隊剿賊一股先儘大股之賊剿辦完一股

再合兵共剿一股如遇零星小股隨見隨剿不

致蔓延臣現親帶凱撤官兵二千名前赴東江

口一帶如賊匪東竄卽可探蹤迎擊倘仍匿老

林並可就近調派鎮將向西搜剿

二月初一日蓋屋縣啞栢鎮具

奏探知逸匪陳四與尹朝貴股匪合夥當卽派兵

分進四路圍殺生擒陳四並僞先鋒劉朝品汪正榜等又於賀家灣生擒趙文炳等一百十八名勦斃淨盡現在東路已就肅清奉

硃批卽有恩旨欽此

初五日接奉

上諭長齡自到陝省以後各路帶兵將領連得勝仗生擒首逆多名該督調度有方著加恩交部議敘欽此
初六日平安溝具

奏於黃官嶺殲斃吳抓抓吳奇生擒僞元帥王占

魁僞總兵吳鳳西等餘皆全行搜獲奉

硃批卽有恩旨欽此

十二日赤沙具

奏_臣帶兵馳赴隴縣初七日行抵赤河地方連夜

進攻該匪佔據山梁我兵奮勇直前相持一時
之久斃賊數十名分兵三面夾擊生擒逆首龔
貴逆妻龍氏賊目龍維通郎生虎楊貴劉大旗
等三百餘人搜拏淨盡並於殲斃賊匪內令活
賊認出逆首向小一割取首級奉

硃批卽有恩旨欽此

十七日鳳縣遵

旨由六百里加緊具

奏擒獲譚貴喜兒係吳孤孤義子皆僞元帥傅老
八龍正光黨友皆僞總兵余九段老入向小二
皆僞先鋒現在棧西一帶肅清仍向棧東分別
排搜

十九日接奉

上諭長齡前在河南巡撫任內失察李文成等謀逆滋

事本有應得之咎至現在陝省匪徒滋事非伊任內之事自派令總統師干調度有方尅期蕝事自當宥其前愆加以懋賞長齡著加恩給予騎都尉世職並賞戴花翎欽此并蒙

賞四喜玉搬指白玉翎管帶版大小荷包等件

二十四日漢中府遵

旨由六百里加緊

奏報南山老林內外漢江南北全行肅清白叟黃童歡欣載道從此共享太平之福不勝慶幸之

至

閏二月初七日具

奏酌籌善後事宜一酌留官兵以資彈壓一被賊蹂躪地方宜普加撫卹一修葺寨堡編紀軍器以重守禦一游匪應從嚴懲辦

同日遵

旨密奏查上年包穀青空糧價昂貴各廠不能多養工人其傭趁者無可營生起意搶奪無業游民隨聲附和聚集人衆抗拒官兵檢查案卷撫臣朱

勲奏辦尙無諱匿情事迨山內木廂炭廠久停
工作匠作亦無所依歸此賊匪之所以裹脅動
輒盈千之實在情形也至刀矛等項賊匪起事
時本屬無幾迨至攻破寨堡愈搶愈多調驗所
獲礮位皆係過山鳥並無某年鑄造字樣實爲
民間防守所鑄無疑驟馬實係各處搶來並非
久經收養旗幟各色皆有大小不一並無五色
分別之事臣每於拏獲活賊逐一研訊並派員
密躡搜看委係木廂工作外來游棍並非邪教

蓄心謀逆

十四日具

奏查明南山鐵廠酌議官爲經理臣由華陽四畝

地柴家園一帶巡查

三月初五日西安府具

奏請兼攝陝西固原提督印務

同日具

奏酌撥營汛以資控制一鐵爐川應添設官兵一
黃牛鋪應安設官兵一盩厔營應添撥弁兵一

定遠廳屬之觀音堂及西鄉屬之子午鎮應添
設汛防一漢鳳營游擊守備各一員請歸漢中
鎮管轄一盩厔營守備把總外委撥歸西安鎮
專管一厚軫子汛由盩厔營撥出千總一員兵
五十名駐劄該汛一七里關營守備弁兵全移
洵陽城內駐劄卽改爲洵陽營一白河縣汛弁
兵改歸洵陽營管轄一板廟子汛弁兵移駐大
山岔一請抽白土營兵六十三名撥歸紫陽營
又請抽孝義營兵八十名撥歸磚坪營一商州

營游擊金鎖關營都司富坪營都司請歸西安
鎮專管一請於西安鎮撥換金鎖關營馬餉二
十分步餉四十分

同日

奏謝領到

恩賜

御製甄別賢愚以澄吏治論墨刻一分

四月十三日

奏請將鳳翔府額貯銀八千兩分撥漢中府銀四

千兩興安府銀四千兩

同日

奏請定鐵廠章程一開廠商民應發給執照以杜私挖一在廠匠役宜有稽查以防混迹一販賣鐵筋應有查考以禁違造一領照商人應酌量交課以免訛索一發商執照宜定限彙咨以歸簡易

同日具

奏籌撥寧陝裁兵餘地請於十九年爲始仍歸各

營分委妥員招佃收租備支公用

十五日接奉

上諭長齡著賞給都統銜作爲伊犁叅贊大臣欽此

二十六日交卸固原提督印務進京

陛見疊蒙

召對

十月二十九日抵伊犁任事會同將軍松

公筠

具

奏今察哈爾額魯特兩營官廠牧放備差犍牛積

至一萬一千有餘適錫伯索倫察哈爾額魯特官兵請買牛三千二百七十五隻每隻例價銀二兩五錢共計價銀八千一百八十七兩五錢卽在該官兵本年冬季應支俸餉銀內扣除又察哈爾營總管以下官兵復請買牛三千六百四十隻應交價銀分三年坐扣其餘牛隻除留二千隻以備公用外尙有餘剩牛隻兩城滿營官兵如有陸續請買者俱照察哈爾營之例辦理

理

同日會

奏惠遠城前年瘟疫官兵於藥舖內賒取藥料過多俸餉不敷坐扣查官兵每員每名年例得口食羊六隻由察哈爾額魯特兩營孳生羊按年支給存剩盈餘向准官兵及額魯特請買每隻交價銀三錢明年夏秋有請買者所得價銀已敷藥料欠項請將此項銀兩先行抵交再於協領等俸餉內分年攤扣歸款

二十年乙亥五十八歲

十二月二十日接准

廷寄內開奉

上諭仔牙墩糾衆謀逆前據成齡等奏報降旨令松筠
前往喀什噶爾查辦松筠到彼已閱四旬有餘尙未
將逆首仔牙墩正法茲又奏稱布魯特比圖爾第邁
莫特反側無定此案成齡屢次奏摺從無一字提及
卽松筠前幾次奏摺亦無一字提及今忽有此奏實
屬可疑著長齡於接奉此旨後卽由木素爾達巴罕
前赴喀什噶爾並帶伊犁明白通事將此案另行審

辦途中與松筠相遇以上各情節不許洩露一字密之慎之並已有旨令成齡永芹仍回喀什噶爾幫同查辦長齡到彼後卽提圖爾第邁莫特覆行審訊如實係助逆自應照松筠原擬辦理不可疎縱若無助謀助逆情事且曾協同官兵查拏逆黨今以疑似之情置之重辟邊疆重地所關匪細事關國家要務長齡不可稍涉迴護查明後仍由五百里覆奏等因欽此

二十四日攜帶辦事大臣印信起程由冰嶺行

走

二十一年丙子五十九歲

正月初五日接奉

上諭據松筠奏圖爾第邁莫特與仔牙墩同罪業將該犯一同凌遲處死甚屬專擅殊爲駭異著長齡到喀什噶爾遵照前旨據實確查其謀逆與否但就現在各人証逐加查訊無難得實務當秉公辦理不可以松筠現係大學士稍存瞻顧並不得以松筠如果獲咎長齡卽當接任伊犁將軍預存引嫌之見松筠原

招發給閱看如究出冤枉情弊由五百里具奏等因
欽此

二月初三日抵喀什噶爾

十二日會

奏查搶奪卡倫之愛勒奇伯克業已正法燒燬馬
廠之助瑪在監病故惟圖爾第邁莫特之第三
子阿則依並該犯之壻莫瑪什俱是親屬自能
備知詳細卽提該二犯隔別親訊緣圖爾第邁
莫特應允仔牙墩幫同滋事抱經起誓繼於霍

隆武等赴彼頒賞時欲行謀害經伊妻兄及子弟等勸阻嗣因未得仔牙墩莊田向伊親戚出言抱怨要想鬧事及往伊薩克處飲酒曾言不得仔牙墩莊田喀什噶爾莫想安靜各情節言之鑿鑿始終如一查閱伊里斯莫特稟述之言大略相同訊據該犯妻兄阿布勒仔斯及民人高建洛並沖巴噶什布魯特比蘇蘭齊所供無異又質之布魯特比拜呢雜爾及閑散伯克拜等十二人所供均屬脗合該犯居心狡詐同謀

助逆已無疑義雖搶劫卡倫燒燬馬厰現無活口質証而欲謀害霍隆武伍通阿等五人衆供確鑿與謀反不分已未行皆凌遲處死之律相符是松筠所擬亦符定律至阿奇木伯克伊薩克查知逆跡既有端倪卽應將該犯家屬先行嚴密防範乃於席間探出逆言張皇洩漏以致犯屬脫逃實屬糊塗錯謬應請革職嗣奉

旨松筠改爲革職留任伊薩克著卽降補五品伯克

同日會

奏圖爾第邁莫特家屬逃出卡外葉堪地方居住
若驟差人前往傳喚稍涉張皇致令疑懼遠竄
將來辦理更覺費手似應暫從寬緩如果該家
屬到色喀庫勒地方彼時由喀什噶爾葉爾羌
兩處大臣會商辦理較爲妥善奉

上諭著長齡傳諭阿則依念爾從來尙知畏法貸爾一
死卽在喀什噶爾監禁至該犯家屬旣已逃逸此時
不必追拏毋庸曲事招徠也等因欽此

二十五日遵

旨覆奏松筠請於喀什噶爾添調烏魯木齊官兵以資
防守洵屬實在情形請仍照嘉慶二年長麟所
辦成規於錫伯索倫兩營調兵三百名派佐領
二員驍騎校四員委驍騎校二員帶赴喀什噶
爾所屬之喀浪圭烏帕拉特伊勒古楚三處卡
倫戍守每年更換一半仍由伊犁鄂爾霍珠勒
卡倫經布魯特地方送至開齊交代其鹽菜經
費每年添銀六千兩口糧羊隻俱照成案開銷
同日覆

奏松筠奏請於僞克塔地方開採煤窑以濟柴薪
一節請仍行封禁奉

上諭甚是必應停止欽此

四月十四日自喀什噶爾起程

五月十五日會

奏上年於喀什河舊渠展寬開挖二十餘里渠寬
水廣由此新開支渠灣長一百七十餘里西北
接入濟爾哈朗山泉水灌闢里沁之一百五十
戶田子田畝而新渠河水勝於泉水所勻出闢

里沁泉水專溉惠遠城旗屯公田實屬兩有裨益此項渠工七八月間即可完竣其惠遠城旗屯公田阿齊烏蘇地方臣連年督飭相地築堡周圍土牆一千一百二十四丈計共三里一分有奇堡內原議蓋房一百所每所先蓋住房三間院牆四面各長十丈便於將來添蓋房屋且可仿照錫伯養鷄畜豕以資生計業已將旗下閒散壯丁移住六十戶至惠寧城滿營於城外西北亦已相地築堡蓋房所有兩城八旗閒散

舊分地畝及惠遠城滿營稻田每年分種各有
分定渠水澆灌

二十五日奉

上諭長齡著補授伊犁將軍欽此

閏六月初一日接印任事

二十二年丁丑六十歲

二月十九日奉

上諭陝甘總督員缺著長齡補授欽此

四月十八日接印任事

二十九日

奏謝領到

御製因循疲玩論墨刻一分奉

硃批實心實力毋懈勉之欽此

五月十三日具

奏查州縣已徵錢糧匿不具報名爲民欠實多官
虧請嚴飭該管道府將已徵未報之項分款造
冊加結具報如係侵盜刻卽叅革治罪若係因
公挪移卽分別勒限追補倘道府稽查不力卽

將該道府嚴叅着賠

六月十一日具

奏巴里坤爲北路扼要自開闢新疆以來設立領
隊總兵分駐滿漢官兵墩臺營汛碁布星羅兼
設鎮西府及宜禾縣以資彈壓稽查凡商人駝
戶等由哈密赴烏魯木齊伊犁等處者俱經哈
密廳給發路照至宜禾縣換照前進迨乾隆五
十九年哈密馱夫楊月奉等因赴奇臺縣挽運
米麪躡出七個井子僻徑係由哈密迤西之瞭

墩直達奇臺縣附近之白山子歸入大道名爲
小南路屢次封開殊無定准伏思哈密至巴里
坤行經松樹塘雖係山梁並非險阻行走數十
年未聞有裹足之虞向來派撥外委帶兵常川
駐守修理道路以利遄行若舍正路而趨僻徑
巴里坤重鎮地方勢必日益蕭索名爲便商實
則病民且東至哈密屬之瞭墩西至奇臺屬之
白山子約計三百餘里並無墩臺營汛殊難稽
查竊虞奸商莠民私販違禁什物由該處偷越

甚或緊要人犯乘閒逃匿新疆重地似不應路
徑分歧相應請

旨禁止小南路奉

上諭永遠封閉如再有商民私由此路行走者查獲照
例治罪再有新疆大臣奏請復開或私令商民行走
者亦治以違旨之重罪決不姑恕欽此

七月二十七日具

奏前奉

上諭飭查甘肅岷州等處番民每年潛往漢中興安究

竟作何生理有無爲匪不法情事向來番民出境有無請領牌照定例應如何稽察約束之處一併查明據實覆奏等因欽此查岷州所屬番民俱係務農度日從不出境故未設有請領牌照之例秦階各州亦無番民潛赴漢中興安開墾荒山情事况番民言服皆異如果到境卽可一望而知值此嚴查保甲之時斷難容其潛跡惟查西鄉鳳縣等處間有四川茂州松潘民人每於冬間來境覓工次年春深仍卽回籍耕種然亦甚屬安靜

從不滋事竊思漢南一帶五方雜處最易藏奸
卽無岷州番民溷跡亦應時加稽察如有奸民
潛赴南山卽當嚴密拏究

八月二十二日

奏謝領到

御製苦旱賦墨刻一分

同日具

奏甘省上年籌辦清查善後章程議請乘穀賤之
時預買兵糧二十萬石向來例價大路不得過

二兩僻路不得過一兩七錢現在雨水應時秋
未豐稔市糧平減較之例價每石實可節省二
三錢再請預買二十萬石按照時價核實辦理
合計兩次預買節省之數約可得銀十萬餘兩
卽將所省之銀併於預買案內一律採買加謹
封貯如遇歉收價貴卽動此項糧石以資接濟
奉

上諭著卽照所請辦理等因欽此

同日

奏駁御史蔣詩請定州縣開倉派員監視以杜虧
空一摺奉

硃批所奏駁甚是只要守成毋懈何必妄自更張欽此
九月十五日

奏報較閱督標營伍及蘭州城守營官兵奉
硃批時加訓練務期精熟欽此

十二月初五日具

奏靈州等十一州縣收成歉薄酌借籽種口糧
二十三年戊寅六十一歲

二月二十二日

奏謝領到

欽定平定教匪紀畧一部

三月十六日

奏謝領到

頒賜

高宗純皇帝聖訓一分

二十八日

奏謝領到

御製弭邪教說墨刻一分

六月二十九日具

奏西寧辦事大臣納爾松阿來信言拉布楞寺喇嘛與隆務昂貴控爭隨桑喇嘛所居寺院並未查看案卷率聽拉布楞寺喇嘛呈控之言卽欲檄調撒拉兒兵三四千名將隆務昂貴剿滅所獲牲畜賞給撒拉兒兵丁以完其事又貴德同知嵇承裕追繳工食之案詢問游擊馬隆所言並未清楚卽欲會銜叅辦粗心任事殊於地方

無益伏思西寧一缺事務繁於新疆但得明白
細心之員辦理卽不致有錯誤從前文孚在任
頗稱鎮靜嚴肅新疆換班之秀寧果齊斯歡皆
曾任侍郎諒與文孚閱歷相等若於此二員中
簡派一員與納爾松阿對調似於公事有裨

同日具

奏審明西寧道陳啟文妄揭臬司屠之申一案定
擬完結

七月二十二日具

奏盤詰在配軍犯張細仵係朱毛俚天地教內教
匪呈出白布執照兩塊審明監候

八月十七日

奏謝領到

御製全韻詩一分

十月十一日具

奏查西藏喇嘛赴京正包定例總以二萬四千觔
爲率餘包定例不過一萬六千觔如有多帶卽
應扣留本年後藏班禪額爾德呢遣使堪布喇

嘯赴京進

貢行抵西寧多帶包一百二十五個秤重四千七百五十五觔業已數千里遠來若竟行扣留恐非仰體我

皇上懷柔遠人之意旣據該堪布呈稱自僱脚力隨後行走似應俯如所請給予路票俾其由內地進京奉

上諭姑如所請嗣後務令遵照定例欽此

二十四日具

奏查渭源等五縣秋收歉薄靖遠等七州縣上年
被災應徵本年新舊正借錢糧仰懇緩徵又皋
蘭等十三廳州縣乏食貧民請借給十一十二
兩月籽種口糧

十一月十六日具

奏籌議鼓勵蒙古防緝番賊章程並請安設防河
官兵

二十四年己卯六十二歲

三月初十日

奏謝領到

恩賞錠子藥一分

二十四日具

奏審明匿名揭告同民叛逆重犯楊啟才請正典

刑

閏四月初十日具

奏貴德循化兩廳與番地毘連請仍復會哨舊章

同日具

奏遵

旨查明甘省自嘉慶元年起至二十二年止已入奏銷實在未完地丁正耗雜賦銀兩糧石草束均係實欠在民應請豁免其各該員因規避處分虛報徵完銀兩請仍著落賠交

十月初八日具

奏請將二十年部駁不准挑變殘馬一千九百四十三匹並現在挑出口老碎小不能產駒殘馬一千四百五十九匹一併變價仍請將挑變章程量爲變通每屆三年均齊一次卽挑變一次

其挑變之數毋庸定額按三年均齊取孳三千
八九百匹之數爲度以一千八九百匹撥補各
營例馬約餘二千匹准變口老殘馬一千八九
百匹如此調劑厰馬不致擁擠水草敷足可期
多牧好馬所用牧放弁兵不多於馬政營務兩
有裨益

同日具

奏查明被雹被水之狄道等州縣本年應徵新舊
正借錢糧緩徵

同日具

奏查明毗連災區十六年起至二十二年止實在
民欠五十萬二千三百兩力不能完請概豁免
是月

奏請

陛見奉

旨准來京

十一月起程順閱陝西滿漢營伍到京

陛見疊蒙

名對

二十五年庚辰六十三歲

正月出京

二月十一日行次固原州校閱陝西提標營伍
二十一日回至蘭州省接印任事

同日具

奏順道查閱固原提屬營伍情形

二十九日遵

旨兼署西寧辦事大臣印務

三月初二日具

奏甘肅皋蘭等十州縣上年被災請酌借倉斗本色糧一萬五千六百石

四月初十日會同

欽差戶部侍郎文公孚遵

旨審明已革頭等侍衛西寧辦事大臣秀寧於驅逐番帳案內多調官兵二百餘名又演戲坐轎濫用委員任令伊妾入廟燒香俱屬顯違例禁迨被西寧道雒昂詳揭不候查辦復摭拾風聞無據

之詞將雒昂叅奏各款俱不得實雒昂因秀寧
往勘番地未經知會心懷不平遂致互相叅揭
雖無病民累商情事惟諭令典史轉告當商典
質衣物已屬不職且秀寧之妾愧悔輕生實由
雒昂偏見誤揭所致分別定擬奉

上諭文孚長齡俱係滿洲大員查辦此案毫無迴護秀
寧之處實屬公正可嘉所辦甚是秀寧著發往伊犁
効力贖罪雒昂著革職回籍欽此

六月十七日具

奏前赴西寧審明定擬借用烏拉之副都統法禮
哈及索借銀兩之筆帖式等分別議處

七月初八日具

奏審明定擬署鞏昌營游擊俞振海被本屬千總
徐士元列款稟揭分別流徒

八月十三日驚奉 部文

仁宗睿皇帝升遐避暑山莊偕烏魯木齊提督蔡

公鼎

率同在城司道苦居三日號擗哀痛具摺籲請

叩謁

梓官奉

批諭邊疆爲要已降不必來京之旨著遵行欽此

九月初七日具

奏中衛等五縣被水被雹請將未完新舊錢糧緩徵其冲塌房屋淹斃牲畜之戶籲懇撫恤

十一月十六日具

奏青海野番又行搶劫總緣河北水草豐盛貪圖牧放私渡插帳日聚日多地方遼濶出沒無定隨時肆劫原議常年會哨之兵僅能追捕搶劫

之賊勢難兼驅番帳若不認真驅逐不但蒙古
游牧地方現被侵佔且恐漸次搶劫熟番擾及
內地該野番行同雀鼠若竟振旅興師勢必聞
風遠竄兵撤復來請於沿邊營汛酌派官兵合
圍剿逐務使河北番帳全行淨盡奉

硃批知道了妥爲料理欽此

是年六月初五日

夫人汪嘉氏卒於蘭州節署子桂翰蒙

賞假奔喪扶柩旋京

恭遇

覃恩給姪孫麟翔一品廕生姪桂芬長子

道光元年辛巳六十四歲

正月初四日具

奏查明陝甘兩省額設兵九萬五千五百餘名內
有馬兵三萬六千三百三十五名較各省多逾
數倍且陝甘山嶺崎嶇馬兵不如步兵得力請
將馬兵裁減十分之一共三千六百三十名俱
以步兵改補統限一年辦竣奉

上諭卽照所議辦理欽此

初十日具

奏審明定擬漢奸馬有柱等夥衆搶劫一案定擬
完結

二十四日起程前赴河州查閱營伍

二月十九日奉

旨加太子少保銜

二十二日查明寧夏等五州縣被災較重請分
別借給口糧奉

上諭認真監放務期實惠及民勿任吏胥侵漁滋弊
欽此

三月初三日具

奏體察甘肅四廠馬匹情形請將殘老碎小之馬
概令變價口內每匹請變價銀三兩口外每匹
請變價銀四兩計每年應變銀一萬五千五百
七十六兩作爲買補不敷營馬一千五六百匹
之價尙有盈餘銀二三千兩似此酌定應留額
數按年撥補挑變庶孳馬不復加增廠地無虞

窄狹並可節省每年添買馬價銀一萬二千餘兩口內又減撤牧兵三百餘名兼省鞴鞋犒賞等銀實於馬政經費營伍均有裨益

二十六日具

奏查甘省武備最關緊要必須聲威雄壯方足以資彈壓若零星散處平時不能合操緩急亦難調遣茲按各地方情形擬裁游擊一員都司五員守備四員添設千把總三員其星散塘汛酌留弁兵巡查兼通聲息餘俱歸併附近營堡以

冀兵數衆多湊成整隊

四月初九日

奏謝領到

欽定明鑑一部

五月初十日奉

旨著協辦大學士仍留陝甘總督之任

七月初九日

奏謝領到

仁宗睿皇帝御製詩三集全函

二十六日具

奏中衛被水村堡照例賑卹蠲緩

八月初八日具

奏審明涇州知州唐錢催徵錢糧尙無勒折浮收
情弊惟於春徵業已完納過半罔恤民隱催追
愈嚴又慮銀價復昂不准減少錢數以致州民
劉成棟倡議會衆湊錢呈控且欲示以兵威張
皇具稟分別定擬完結

二十五日具

奏審明陝西大荔縣民柳全璧因朱錫琳嗔伊控
追欠銀登門尋鬪輒喝令王九九子用鎌刀砍
傷朱錫琳身死實屬威力主使復裝傷避罪賄
囑官吏妄報自縊又倩人誣証自殘輾轉掩飾
以致屍親屢告拖斃三命承審各官不能審出
真情平反擬結

同日具

奏查明被水被旱較重之河州等十州縣請將新
舊錢糧草束廠租等項緩徵其臯蘭等六州縣

並借給一月口糧

同日具

奏石峯堡地處山巔向無居民乾隆四十九年善
後案內議設守備把總外委各一員兵一百名
迄今情形迥異徒滋閒曠請將守備一員外委
一員兵五十名改撥安定營俾成整隊底店汎
千總改撥富平汎毋庸添設把總以省糜費

九月初五日具

奏甄別州縣各官

十月初五日具

奏驅逐野番雙勿蘊依二族逃匿口外未便深追
暫令撤兵責成喇嘛等就近嚴催該番族屆期
搬移

是月武闡鄉試事竣籲請

陛見

十六日具

奏請修蘭州北門樓座銀臺城垣及華林山營堡
並中衛縣城垣

同日具

奏靖遠等州縣乏食貧民請借給兩月口糧

十一月初二日

奏謝領到

仁宗睿皇帝御製詩四集全函

同日密陳陝甘兩省各官考語

初六日交卸起程

二十七日介休途次

奏謝領到

御書福字等物

同日奉

上諭山西巡撫卬務著長齡護理欽此

十二月初四日接受巡撫關防提督鹽政卬務
初七日訊明前任巡撫成格於學政陳官俊回
京後密奏其毆差納妾等款俱係空言陳官俊
不知慎密分別覈擬具

奏奉

旨成格著降補主事陳官俊著降補編修欽此

十二月到京

陛見疊蒙

召對

是年子桂輪奉

旨陞二等待衛